

Der Gerchla aff der Lahmaschüt,
 A Striek, wöis mehr git,
 Der kröigt amoul an Nammittog
 Zo Äpf'ln Appetit.

Von Kaf'n is ba ihn ka Ried,
 A Bou hout jo ka Göld,
 Und häit er ans, so häit'n doch
 Die Lust zon Kaf'n gfohlt.

Dös waß er besser; — vur'n Tur
 Dou is a groußer Gart'n,
 A Bam mit Äpf'ln steiht dou drin,
 Döi ner affs Blot'n wart'n.

Mei Gerchla steigt frisch über'n Zau
 Und klettert aff'n Bam;
 Su Äpf'l, wöi er dou ohtrifft,
 Döi sicht mer ner in Tram.

G'schwind stopft er alli Tasch'n vul
 Und gutzt derzwich'n noh,
 Dou kummt der Gärtner mit an Stuk
 Die Haptallee dort roh.

Der Gerchla röicht den Brout'n glei, —
 Von'n Bam roh, übern Zau!
 Der Gärtner fängt ah z'laf'n oh,
 Schnaft wöi a Dachs in Bau.

Und übern Zau, dou schreit er naus:
 Du manst, i will di schlog'n?
 Na, Klaner, halt! Gei her zo mir,
 I will der ner wos sog'n.

Allah der Gerchla hout ka Lust
 Und ah ka röchts gouts Gwiss'n;
 Er schreit: A klaner Bou wöi iech
 Der mouß nit alles wiss'n.

Wolfgang Weikert

DER PFARRER AUF DER TAUFE

Der Bauer Michl hout zor Taf
Sein Pfarrer glod'n ei,
Und dou hout trog'n sei Frau fest af,
Wals mou amoul su sei.

Der Pfarrer hout an Appetit
Su gsund als ner geht oh,
Ka Kostverächter is er nit,
Er brauchts ah nit, der Moh.

Aff d' Letzt wörd ah a Käs aftrog'n
Nouch all den Houchgenuß,
Aff amoul tout der Pfarrer sog'n:
„Dös is der Mog'nschluß“.

Wöi dös der Michl häiern tout,
Denkt der: Du woarst schöi dumm;
Doch wart ner, döi Ried is scho gout,
Es nächst Moul dreh i's rum.

Wenn ih den Kös häit z'eirscht göb'n,
Wär gwest nit su vermess'n,
Nou häit der Pfarrer, i wett 's Löb'n,
Ganz gwieß nit su viel gess'n. —

Su ungefähr a Jouhr draf
Flöigt wider der Storch rumma,
Su daß nou wider git a Taf,
's tout ah der Pfarrer kumma.

No, denkt der Michl, öitz houts gschellt:
Stellt zeierst in Kös öitz noh,
Will söhg'n, wöis in Herr Pfarrer gfällt
Und wos er nou fängt oh?

Der Pfarrer nehmt a Stückla raus,
Sagt: „Michl, ih leugn's niet,
A Stückla Kös vur su an Schmaus
Dös reizt in Appetit.“

Karl Hörber